





# Fundacion CINEARUBA nomina pa un 'Gouden C' di Hulanda



ORANJESTAD (AAN): E fundacion local a ricibi e noticia cu un di nan proyecto a wordo nomina pa un 'Gouden C.'

Aña pasa CINEARUBA a realisa e proyecto 'Drama den aire' di cual e presentacion final tabata un obra auditivo titula 'E bola di fuego.' Hobennan y adultonan a forma parti di e obra aki cu a wordo presenta live riba Facebook. E proyecto 'Drama den Aire' tabata posibel door di e sosten di Fonds voor Cultuurparticipatie. E fondo tur aña ta entrega un reconocimiento na e miho proyecto den forma di un 'Gouden C' y fundacion CINEARUBA su proyecto 'Drama den aire' ta un di e cinco nominadonan pa e premio.

"Nos nunca a spera e nominacion aki y e simpel hecho di ta nomina nos di CINEARUBA ta hopi contento". Asina Juan, coordinador di proyecto pa fundacion CINEARUBA a expresa. CINEARUBA kier gradici tambe tur esnan cu a forma parti di e proyecto y a duna nan tempo pa por a

hacie posibel. Un danki na Melisa Richardson, Aldrich Marchena, Natasha Richardson, Teo Lopez, Milly Koolman, Adelaida Fingal, Danny Martinez, Ginelly Quandt, Rodrigo Peraza, Rotsena Pietersz, Roy Howell y Adriano Nanof.

Fundacion CINEARUBA tin nueve aña di existencia enfocando riba e sector cultural, educacional, social y creativo. Fundacion CINEARUBA ta agradecido pa tur e apoyo cu Fonds voor Cultuurparticipatie di Hulanda a sa di brinda na CINEARUBA pa asina e fundacion por a logra ehecuta diferente proyectonan na e interes y desaroyo di e comunidad di Aruba.

Entre e siman 24 pa 28 di juni Fonds voor Cultuurparticipatie lo duna di conoce cua proyecto ta ganador di e 'Gouden C' y esaki e fondo lo hacie pa medio di sorpresa esnan di e proyecto ganador. Esnan cu ta interesa den wak e obra auditivo 'E bola di fuego' por bishita fundacion CINEARUBA su pagina di Facebook.